

Fehim Behlilović, dipl.ing.geodezije

Dana 16.10.2000. godine iznenada smo se oprostili od našeg poštovanog, dragog i cijenjenog kolege Fehima Behlilovića, doajena geodetske djelatnosti, koji je sve do svojih zadnjih dana učestvovao u kreiranju ove djelatnosti, pritom dajući vrlo korisne savjete za njeno poboljšavanje.

Rođen je 01.10.1918. godine u Mostaru, a osnovnu školu i nižu gimnaziju završio je u Trebinju, a srednju geodetsku školu u Beogradu.

Svoj radni vijek započeo je u Sreskoj katastarskoj sekciji u Prištini na Kosovu, gdje ostaje sve do početka II svjetskog rata, odakle prelazi na službu u Banja Luku.

Odmah poslije svršetka rata prelazi u Sarajevo, na službu u Geodetsku upravu BiH, gdje je postavljen za načelnika Odjeljenja za katastar.

Uporedo sa radom, studira na Geodetskom odsjeku Tehničkog fakulteta u Zagrebu i već 1958 godine, uspješno okončava studij i stiče zvanje diplomiranog inženjera geodezije.

Funkciju načelnika u Geodetskoj upravi BiH obavlja sve do 1980 godine, kada i odlazi u zasluženu mirovinu.

U svom radnom vijeku bavio se različitim granama geodetske djelatnosti, ali mu je uža specijalnost bila katastarska djelatnost, te radeći i kreirajući ovu djelatnost dostigao je takav nivo, da je bio jedan od najpoznatijih i najpriznatijih poznavalac ove djelatnosti u bivšoj Jugoslaviji.

Između ostalog, ovo priznanje je stekao iz razloga, što je već 1970 godine, prvi u bivšoj Jugoslaviji, ponudio projekat kompjuterizacije katastarskih operata, koji je prihvaćen i odmah počeo da se primjenjuje u općinskim geodetskim organima u BiH, pa i šire, pritom ponudivši svoja vlastita pravilnička rješenja, koja se uz male dorade i danas primjenjuju u geodetskim službama u BiH.

Fehim je jedan od prvih geodetskih stručnjaka u bivšoj Jugoslaviji, koji je zagovarao formiranje jedne jedinstvene evidencije o nekretninama, umjesto dosadašnjih triju evidencija, što je zahvaljujući i njegovoj stručnosti u ovoj oblasti i upornosti rezultiralo donošenjem Zakona o premjeru i katastru nekretnina, a u mnogim članovima ovog zakona ugrađene su njegove ideje, tako da se slobodno može reći da je Fehim jedan od kreatora današnjeg katastra nekretnina, koji se danas uspostavlja na prostorima naše BiH, a na kojeg smo mi geodeti vrlo ponosni.

Naš Feha, kako smo ga mi kolege i prijatelji iz milja zvali, bio je jedan od pionira posljeratnog formiranja katastarskih službi u Bosni i Hercegovini, kao i formiranja Geodetske uprave BiH i on je skupa sa ostalima kolegama, faktički od ništa stvorio geodetsku službu u BiH, koja je kasnije bila daleko najbolja na prostorima bivše Jugoslavije.

Nije se zanimao samo geodezijom, nego je uz svoje profesionalne obaveze, nastavio porodični hobi odnosno bavljenje filatelijom, postavši pasioniranim kolekcionarom poštanskih maraka, stvorivši jednu vrhunsku zbirku maraka, a Filatelističko društvo BiH odalo mu je zbog toga priznanje, birajući ga, nekoliko puta, za predsjednika

svog društva. Za života je uspio animirati sina Narcisa i unučad da nastave sa ovim hobijem, koji je odavno postao porodična tradicija.

Za svoj rad u struci bio je nekoliko puta odlikovan i nagrađivan, a za nas kolege i prijatelje bio je drag sagovornik i još bolji savjetnik.

Skupa sa svojim divnim bračnim drugom Mimom, stekao je i odgojio dvoje divne djece, koji su danas doktori nauka i vrlo priznati stručnjaci u svojim strukama.

Svi mi koji smo radili i drugovali sa Fehom ili bili članovi njegove familije ili rodbine, ponosni smo što smo imali takvog čovjeka za svog kolegu, prijatelja, supruga, oca, djeda ili rođaka.

Za sve ono što je učinio nama kolegama i za sve ono što je ostavio geodetskog struci, Hvala našem Fehimu i uvijek će ostati u našim srcima i uspomnama, kao jedan divan čovjek i vrhunski geodetski stručnjak.

Dedo Karabeg